



**O**thmarus ille in Sueuia apud Germanos natus, atq; apud Curiam Rhetorum bonis literis institutus fuit. propterea cum felici indole & optimis moribus esset præditus, factum est ut alios omnes æquales suos pietate & eruditione longe superaret. Eo autem tempore celebris schola à S. Gallo prius in eremis instituta, passim commendabatur. itaque multi homines eruditi ibidem confluebant. Cum uerò multa præter ordinem ab ijs fierent, atque quisque alteri præferri cuperet, tandem eius scholæ optimates ad Vualthramum comitem (qui nomine Pipini regis Francorum Caroli Martelli filio ijs in locis præsidebat) uenerunt petentes, ut Ab-

batem aliquem ipsis ordinaret, quem tanquam patrem obseruarent, atq; eius iussa capescerent. Itaq; Vualthramus hunc Othmarum ad Pipinum transmisit, atq; effecit ut is ab eodem in Abbatem S. Gallensem primum constitueretur, Anno post Christum natum 720.